

欽定理藩部則例



第十八冊

中國藏學史料叢刊 第二輯

欽定理藩部則例 三函十八冊

原著 (清) 松森等修

編輯 中國藏學研究中心

主編 多杰才旦

副主編 陳家璣

廖祖桂

標點 吳豐培

責任編輯 王哲卿

出版 中國藏學出版社

北京中原快速印刷服務部印刷

印數 一—五〇〇

書號 ISBN 7-80057-010-X/D001

定價 一百八十元

欽定理藩部則例卷六十一

西藏通制上

西藏設駐劄大臣

西藏諸處事務均隸駐藏大臣核辦

稽查商上公用

稽查商上收支

稽查外番差人來藏

打箭爐稅銀撥賞達賴喇嘛

噶布倫戴琿頒給

敕書

噶布倫以下各官給與頂戴

後藏扎什倫布增設業爾倉巴等官

噶布倫等官房莊田隨任交代

揀放坐牀堪布喇嘛

西藏喇嘛錢糧不許豫領

番民爭訟分別罰贖不得私議抄沒

禁止私給照票免差

達賴喇嘛班禪額爾德尼族屬不得攙越管事

欽定理藩部則例卷六十一

西藏通制上

增纂

西藏設駐劄大臣

一西藏設駐劄大臣二員辦理前後藏一切事務其大臣更代均由

特簡

增纂

西藏諸處事務均隸駐藏大臣核辦

一駐藏大臣總辦闔藏事務與達賴喇嘛班禪額爾德尼平行噶布倫以下番目及管事喇嘛分係屬員無論大小事務俱稟明駐藏大臣核辦至扎什倫布諸務亦一體稟知駐藏大臣辦理不准歲琿堪布等代辦該大臣巡邊之便稽察管束

增纂

稽查商上公用

一每年番民交納各以糧石或氈氊藏香大棉

鹽觔酥油奶渣羊腔茶葉等項作爲租賦其
遠處寨落難以運送者各以銀錢折交番民
家有牛羣羊羣者每牛二頭每年交銀錢一
圓每羊十隻每年亦交銀錢一圓其隨時佈
施物件銀兩並無定數除交各項木色物件
外約計每年所入銀兩共十二萬七千有零
凡有交納物件銀錢俱收存大昭庫內設商
卓特巴三名管理其氍毹藏香及稅課罰贖
等項各處佈施之物並番民故後例交一半

服飾物件均交商上庫內另設商卓特巴二
名管理達賴喇嘛公用日費等項皆出於此
計算用項每年正月內布達拉與各處大寺
廟大小衆喇嘛及前後藏各處喇嘛數萬人
會集大昭念經二十日二月內復集大昭念
經八日按喇嘛名數賞給銀錢哈達支給酥
油茶葉糌粍共需銀七萬九百餘兩又每日
念經需用酥油茶葉及各項賞賚共需銀三
萬九千二百餘兩又每年採買布達拉衆喇

嘛食用及各種物料並酬答佈施物件共需銀二萬四千四百餘兩所入尙不敷所出又色拉等大寺喇嘛均須養贍青稞豐收之年並佈施較多年分始有盈餘商上又有小庫一處另派商卓特巴一名管理每年出入如有餘剩物件銀兩歸入小庫存貯如遇不敷支用之年卽將小庫銀物使用一切用度商卓特巴總司出納亦同噶布倫呈報駐藏大臣噶布倫商卓特巴等缺均歸駐藏大臣會

同達賴喇嘛秉公揀選不許達賴喇嘛親族
管事其商上一切公用悉責成駐藏大臣會
同濟隴呼圖克圖實力稽核出納如有侵漁
舞弊之人濟隴呼圖克圖卽告知駐藏大臣
查辦照例治罪至扎什倫布所管番民應交
商上糧賦多係交納物件統計折色本色約
合銀六萬六千九百餘兩計每年用度約需
銀七萬四千六百餘兩從前各處佈施較多
每年總有盈餘經廓爾喀搶掠後每年出入

連佈施核計僅敷用度亦交駐藏大臣及濟
隴呼圖克圖實力稽查以歸畫一其達賴喇
嘛班禪額爾德尼平素自奉以及例應需用
各項仍聽其自便

增纂

稽查商上收支

一達賴喇嘛班禪額爾德尼商上得項除養贍
喇嘛番衆外如有盈餘作爲唐古忒兵丁養
贍之用一切收支悉責成駐藏大臣稽查凡

換班官兵以及駐藏大臣公私費用不准於
商上侵挪

增纂

稽查外番差人來藏

一西藏地方遇有廓爾喀稟請之事均由駐藏
大臣總理其呈送達賴喇嘛班禪額爾德尼
土物應給謝禮回諭亦由駐藏大臣代爲酌
定給發如有關係地方事件及通問佈施均
報明駐藏大臣聽候辦理其布魯克巴素信

紅教每年遣人來藏向達賴喇嘛呈遞佈施
哲孟雄宗木洛敏達等小部落差人來藏均
由邊界營官查明人數稟明駐藏大臣驗放
進口並令江孜定日駐劄備弁實力稽查其
到藏瞻禮後該部落差人稟明駐藏大臣由
駐藏大臣給諭其呈達賴喇嘛等稟啟俱應
呈送駐藏大臣譯出查驗由駐藏大臣與達
賴喇嘛將諭帖酌定給發查點人數再行遣
回其噶布倫雖係達賴喇嘛管事之人不准

與各部落私行通信卽各部落有寄信噶布倫者亦令呈送駐藏大臣與達賴喇嘛商同給諭仍不准噶布倫等私行發給倘有私行來往暗通信息之事駐藏大臣卽將噶布倫等革退

增纂

打箭爐稅銀撥賞達賴喇嘛

一打箭爐所收稅課內每年撥銀五千兩賞給達賴喇嘛作爲養贍僧衆之費於每年遣人

至打箭爐領取茶葉之便祇領帶往

增纂

噶布倫戴琿頒給

勅書

一西藏噶布倫戴琿缺出奉

旨補授者令其將舊領

勅書送部查銷另行辦給

勅書

修改

噶布倫以下各官給與頂戴

一噶布倫准其戴用三品頂戴毋庸給與扎薩克名號四品戴琿以下各官均按品級給與頂戴其翎支除

恩賞外不准戴用非有軍功該大臣等亦不得濫行奏請

續纂

後藏扎什倫布增設業爾倉巴等官

一後藏扎什倫布舊設商卓特巴一人增設四

品虛銜業爾倉巴一人四品虛銜小商卓特
巴一人五品虛銜管馬達琿一人作爲定額
由駐藏大臣發給執照出缺時查照舊章揀
選補放不准私行挑補

增纂

噶布倫等官房莊田隨任交代

一藏內噶布倫等撥給房屋莊田照內地衙署
廉俸之例給現充之人居住管理一經缺出
卽行交代新任不許稽遲